



15
1987

Bosnia and Herzegovina
Federation of Bosnia and Herzegovina
CANTON SARAJEVO
Ministry of Health

Broj: 10-33-644-18/26
Sarajevo, 20.04.2026.godine

SKUPŠTINA KANTONA SARAJEVO
Stručna služba za Skupštinske poslove
- Ovdje-

PREDMET: Odgovor na zastupničko pitanje-dostavlja se

Zastupnica Sebija Izetbegović u skladu sa članom 106. poslovnika Skupštine Kantona Sarajevo ("Službene novine Kantona Sarajevo", broj 41/12- Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22- ispravka i 47/24), dana 31.03.2026.godine, uputila je zastupničko pitanje, koje se odnosi na nabavku citostatika za potrebe pacijenata sa područja Kantona Sarajevo.

U vezi sa dostavljenim pitanjem Komisija za realizaciju prioritetnog programa lijekova koji se koriste u terapiji kod onkoloških pacijenata na području Kantona Sarajevo dostavila je Ministarstvu zdravstva Kantona Sarajevo sljedeći

ODGOVOR

Nabavka citostatika vrši se u skladu s njihovom dostupnošću na tržištu, isključivo putem ovlaštenih dobavljača koji ispunjavaju propisane tehničke i sigurnosne uslove za promet lijekova, te posjeduju važeće odobrenje za rad izdato od strane Agencije za lijekove i medicinska sredstva Bosne i Hercegovine (ALMBiH). Prilikom nabavke citostatika primjenjuje se član 10c Zakona o javnim nabavkama Bosne i Hercegovine.

U okviru komunikacije sa ovlaštenim zastupnicima za pojedine lijekove, pribavljene su najniže moguće cijene koje su mogli ponuditi isključivo za realizaciju predmetnog programa, čime je osigurana pravovremena dostupnost terapije uz postizanje maksimalnih ušteta za Zavod zdravstvenog osiguranja Kantona Sarajevo (ZZOKS). Cijene po kojima se citostatici nabavljaju i fakturišu dogovorene su u prostorijama Ministarstva zdravstva Kantona Sarajevo, u prisustvu predstavnika Ministarstva. Cijene koje su ponuđene od strane proizvođača, prema informacijama



dostavljenim od proizvođača i njihovih ovlaštenih zastupnika, identične su cijenama po kojima se isti lijekovi fakturišu Federalnom fondu solidarnosti, a sve u cilju osiguranja pravovremene terapije za pacijente uz racionalno i planirano korištenje sredstava ZZOKS-a. Javna ustanova Apoteke Sarajevo (JUAS) fakturiše ugovorom jasno definisane cijene, bez ikakvih dodatnih rabata ili finansijskih pogodnosti od strane dobavljača ili proizvođača.

Naknada koju ustanova ostvaruje od strane ZZOKS-a, u svrhu nadoknade troškova nabavke, skladištenja i transporta citostatika, iznosi 3% od fakturisane vrijednosti lijekova.

Nabavka citostatika je vršena od sledećih veledrogerija :

Farmavita

Interpromet

Hercegovinalijek

Glosarij

MGM

Oktal pharm

Unifarm

Finansiranje citostatika putem posebnog programa za pacijente Kantona Sarajevo koji su na listi čekanja Federalnog fonda solidarnosti se finansira iz sredstava Zavoda zdravstvenog osiguranja Kantona Sarajevo.

Potrošnja citostatika za 2024. godinu je iznosila 1.777.904,64 KM.

Potrošnja citostatika za 2025. godinu je iznosila 15.618.197,06 KM.

Za 2026. godinu planirano je 25.000,000 KM

Distribucija i dostupnost citostatika

Raspodjela citostatika na području Kantona Sarajevo regulisana je odlukama o prioritetnim programima lijekova ("Službene novine Kantona Sarajevo", br. 39/24), kao i Ugovorom o pružanju farmaceutskih usluga i snabdijevanju medicinskim sredstvima osiguranih lica Zavoda zdravstvenog osiguranja Kantona Sarajevo broj 01-33-5-34311/24 od 10.10.2024. godine, uz pripadajuće anekse, te procedure. Program je kreiran s ciljem eliminacije listi čekanja za uvođenje u pravo korištenja citostatika sa posebnim režimom propisivanja, tako da Kanton Sarajevo preuzima finansiranje za sve rezidente Kantona koji se nalaze na listama čekanja Federalnog zavoda zdravstvenog osiguranja i reosiguranja (FZZOIR).

Na osnovu ovih akata, raspodjela se vrši prema kriterijima:

1. Status pacijenata na listama čekanja FZZOIR,
2. vrsta terapijskih protokola (lijekovi koji se nalaze na Listi lijekova sa posebnim režimom propisivanja Fonda solidarnosti Federacije Bosne i Hercegovine sa listom propisanim indikacionim područjima),
3. medicinske hitnoće,
4. status osiguranja u Kantonu Sarajevo.

Kontrola i nadzor

Komisije za uvođenje osiguranika u pravo korištenja citostatika sa posebnim režimom propisivanja FZZOIR održavaju se jednom mjesečno. Na osnovu njihovih zaključaka, identificiraju se pacijenti, koji nisu uvedeni u pravo korištenja citostatika sa posebnim režimom propisivanja, te se isti kandidiraju za Program KS prema propisanim kriterijima.

Organizacione jedinice Kliničkog centra Univerziteta u Sarajevu (KCUS) – Klinika za onkologiju, Klinika za hematologiju i Klinika za plućne bolesti "Podhrastovi", koriste bazu podataka u kojoj se evidentira status pacijenta, vrsta terapije, farmaceutski oblik, potrebna količina za aplikaciju jednog ciklusa terapije i termini trebovanja lijekova koji se računaju automatski uzevši u obzir interval aplikacije onkološke terapije, te vrijeme za isporuku lijeka predviđeno Ugovorom. Zahvaljujući tim bazama moguće je pratiti dostupne količine lijeka po pacijentu, te ukupno dostupne količine po lijeku.



Na sedmičnom nivou se spiskovi kandidata dostavljaju Zavodu Zdravstvenog osiguranja Kantona Sarajevo (ZZOKS), koji provjerava kriterije i izdaje saglasnosti. Lijekovi se potom poručuju na ime pacijenta koji imaju saglasnost ZZOKS. Nakon što određeni pacijenti prestanu biti u indikaciji za nastavak liječenja ili dobiju Saglasnost Fonda Solidarnosti za uvođenje u pravo korištenja citostatika sa posebnim režimom propisivanja preko Fonda, lijekovi trebovani za te pacijente se redistribuiraju pacijentima sa indikacijom. Zbog svega navedenog – sedmično naručivanje na ime pacijenta uz postojanje evidencije o količini dostupnih lijekova po lijeku i pacijentu, praktično ne postoje lageri lijekova, nego je riječ o dinamičnom procesu planiranog naručivanja za svakog pacijenta prema planu liječenja.

Mjere za osiguranje kontinuiteta

Narudžbu i distribuciju lijekova vrši JU Apoteke Sarajevo u rokovima predviđenim Ugovorom.

Parenteralni lijekovi se distribuiraju preko Kliničke apoteke KCUS-a, dok pacijenti peroralne oblike preuzimaju u Apoteci Koševo (OJ JU Apoteke Sarajevo) uz recentan nalaz onkologa. Svi lijekovi se signiraju na ime pacijenta i mogu biti izdati isključivo delegiranom pacijentu, osim u slučaju prekida indikacije kada se preusmjeravaju na prvog pacijenta sa odgovarajućom indikacijom i saglasnošću ZZOKS. Organizacione jedinice KCUS-a i Apoteka Koševo vode protokole o izdavanju lijekova. Od inicijacije programa u oktobru 2024. godine do danas nije bilo problema u isporuci lijekova koji bi uzrokovali odgađanje liječenja. Kontinuirana profesionalna komunikacija svih involviranih partnera uz praćenje procedura koje planiraju sprovođenje Ugovorom predviđenih radnji, osigurava pravovremenu dostupnost terapije u skladu sa kriterijima dobre farmaceutske i liječničke prakse.

Obrazloženje

U proteklih 18 mjeseci je preko 650 pacijenata, koji su rezidenti Kantona Sarajevo, pravovremeno tretirano indiciranim lijekovima. Prosječno vrijeme čekanja na uvođenje u pravo liječenje, koje je prije programa iznosilo oko 250 dana, smanjeno je na 40 dana s trendom daljeg skraćivanja. Ovi rezultati potvrđuju da se radi o značajnom benefitu za pacijente rezidente Kantona Sarajevo, uz poštivanje svih relevantnih akata i procedura.

Nabavka i distribucija citostatika jedno je od najosjetljivijih pitanja u zdravstvenom sistemu.

Transparentnost i preciznost u ovom procesu od presudnog su značaja, jer se radi o lijekovima koji direktno utiču na živote pacijenata. Skupština Kantona Sarajevo, kao tijelo koje vrši nadzornu funkciju, ovim putem dobija potpune informacije o kriterijima, procedurama i mjerama koje se provode, kako bi se osiguralo povjerenje građana i zaštita njihovog prava na liječenje. Sve eventualne nejasnoće otvoreni smo dodatno elaborirati.

S poštovanjem,


MINISTAR
Prim. mr sci. dr. [redacted] Hasanović

DOSTAVITI:

- Naslovu
- Stručna služba Vlade Kantona Sarajevo - Ovdje-
- a/a



